



- \* Ваҳобийлик нима? “Ҳизбут-таҳрир ал-Исломия”-чи?
- \* “Қулоқ” деб аталган айбсиз айбдор мазлумлар
- \* “Сени излайман” йўқолганлар ва йўқотганлар учун
- \* Баъзи машҳурлар бир синфда икки йил ўқиган



# Туркистон

Элим деб, юртим деб, ёниб яшаш керак

1925 йилдан чиқа бошлаган

ЎЗБЕКИСТОН ЁШЛАРИ «КАМОЛОТ» ЖАМҒАРМАСИ ГАЗЕТАСИ

2000 йил 12 февраль Шанба. № 13 (14295)

## Иккинчи чақириқ Ўзбекистон Республикаси Олий Мажлиси биринчи сессиясининг иккинчи йиғилиши тўғрисида АХБОРОТ

11 февраль куни Тошкентда иккинчи чақириқ Ўзбекистон Республикаси Олий Мажлиси биринчи сессиясининг иккинчи йиғилиши очилди.

Парламент сессиясининг йиғилишида Ўзбекистон Республикаси Президент Ислам Каримов иштирок этди.

Мажлис залда Вазирлар Маҳкамаси аъзолари, республика ташкилотларининг раҳбарлари, хорижий давлатлар элчилари ва дипломатия корпусининг вакиллари, хорижий ва республика оммавий ахборот воситаларининг мухбирлари ҳозир бўлди. Йиғилишни Олий Мажлис Раиси Э.Халилов бошқарди.

Депутатлар сессиянинг ишчи органи - котибиятни туздилар, кун тартибини тасдиқладилар.

Олий Мажлисининг 22 январда бўлиб ўтган биринчи сессиясининг биринчи йиғилишида Президент Ислам Каримов қилган маъруза юзасидан парламент қарор қабул қилди.

Шундан кейин депутатлар парламент кўмиталари ва комиссияларини, уларнинг раисларини, шунингдек Олий Мажлисининг Инсон ҳуқуқлари бўйича вакилини сайлашга киришди.

Кун тартибидаги ана шу масалалар

юзасидан Олий Мажлис Раиси Э.Халилов маъруза қилди. Кўмиталар ва комиссияларнинг раислари рўйхати, шунингдек Олий Мажлисининг Инсон ҳуқуқлари бўйича вакилини (омбудсманни) сайлаш тўғрисидаги қарор матбуотда эълон қилинмоқда.

Депутатлар шундан кейин сиёсий партияларнинг Олий Мажлис депутатлари фракцияларини ҳамда ҳокимият вакиллик органлари ва сайловчилар ташаббускор гуруҳларининг депутатлари блокларини рўйхатга олиш тўғрисидаги масалани кўриб чиқишга киришди. Шу масала юзасидан Ўзбекистон “Адолат” социал-демократик партияси сиёсий кенгашининг биринчи котиби Т.Даминов, “Ватан тараққиёти” партияси марказий сиёсий кенгашининг раиси А.Турсунов, “Миллий тикланиш” демократик партияси марказий кенгашининг раиси И.Фафуров, Ўзбекистон Фидокорлар миллий-демократик партиясининг бош котиби Э.Норбўтаев, Ўзбекистон Халқ демократик партияси марказий кўмитасининг котиби И.Кочмарик, ҳокимият вакиллик органлари депутатлари блоки раҳбари Қ.Обидов, сайловчилар ташаббускор гуруҳларининг депутатлари блоки раҳбари А.Саидов сўзга

чиқди.

Депутатлар Олий Мажлис Кенгашини тузди, Кенгаш таркибига Олий Мажлис Раиси ва унинг уч ўринбосари, парламент кўмиталари ва комиссияларининг раислари, депутатлар фракциялари ва блоклари раҳбарлари кирди.

Қисқа танаффусдан сўнг Олий Мажлис Вазирлар Маҳкамасининг янги сайланган Олий Мажлис олдида ўз ваколатларини зиммасидан соқит этиши тўғрисидаги масалани кўриб чиқишга ҳамда Ўзбекистон Республикаси Президентининг Вазирлар Маҳкамаси таркиби ҳақидаги Фармонини тасдиқлашга ўтди.

Бу масала юзасидан давлатимиз бошлиғи Ислам Каримов нутқ сўзлади. У таклиф этилаётган ҳукуматнинг таркибий тузилишини, унинг шахсий таркибини муфассал баён этди. Мамлакатимиз Президентини ҳукумат фаолиятига баҳо берар экан, ижро этувчи ҳокимият салоҳиятидан тўлароқ фойдаланиш, Вазирлар Маҳкамаси ҳар бир аъзосининг топширилган иш жабҳаси учун масъулиятини ошириш зарурлигини таъкидлаб ўтди. Депутатларга ҳукумат раҳбарияти ва аъзолари шахсан тақдим этилганидан сўнг Олий Мажлис Ўзбекистон Республикаси Президентининг

республика Вазирлар Маҳкамаси таркиби ҳақидаги Фармонини тасдиқлади.

Олий Мажлис Ўзбекистон тузган бир қатор халқаро шартномалар ва битимларни ратификация қилди, Ўзбекистон Республикаси Президентининг айрим Фармонларини тасдиқлади.

Биринчи сессия котибияти раҳбари Т.Файзуллаев Олий Мажлис сессиясининг номига депутатлардан, муассасалар, ташкилотлар, жамоат бирлашмалари раҳбарларидан ва фуқаролардан келиб тушган мурожаатлар тўғрисида депутатларга ахборот берди. Ана шу мурожаатларнинг ҳаммаси кўриб чиқиш учун тегишли органлар ва ташкилотларга юборилди.

Парламент Конституциявий суд ва Олий суд судьялари таркибига ўзгартишлар киритди. Депутатлар Олий Мажлис 2000 йилда кўриб чиқиши керак бўлган қонун лойиҳаларининг рўйхатини асос учун қабул қилди. Ҳужжат бу борадаги ишларни давом эттириш учун парламент кўмиталари ва комиссияларига берилди.

Шу билан иккинчи чақириқ Ўзбекистон Республикаси Олий Мажлисининг биринчи сессияси ўз ишини якунлади.

## Президент Ислам Каримовнинг Олий Мажлис биринчи сессияси иккинчи йиғилишида сўзлаган

### НУТҚИ

Ассалому алайкум, азиз дўстлар!

Мухтарам халқ депутатлари! Сизларга маълумки, Ўзбекистон Республикаси Конституциясининг 98-моддаси ва “Вазирлар Маҳкамаси ҳақида”ги Ўзбекистон Республикаси қонунининг 4-моддасига биноан Вазирлар Маҳкамаси янги сайланган Олий Мажлис олдида ўз ваколатларини зиммасидан соқит қилади.

Конституциямизга асосан Ўзбекистон Республикаси ҳукуматининг янги таркиби Президент томонидан Олий Мажлис депутатлари тасдиғига қўйилди.

Ҳукуматнинг янги таркиби ҳақида гапирганда, мен бу масаланинг қуйидаги муҳим томонларига сизларнинг алоҳида эътиборингизни жалб қилмоқчиман.

Аввало, бугунги кунгача фаолият кўрсатган Вазирлар Маҳкамасининг сон жиҳатдан таркиби тўғрисида айтиб ўтиш жоиз.

Маълумки, олдинги таркибда ҳукумат аъзоларининг сони ўттиз етти нафардан иборат эди. Яъни Бош вазир ва унинг муовинлари, ўн бешта вазир ва ўн битта давлат кўмитасининг раиси лавозимлари бор эди.

Конституциямизнинг 98-моддасига биноан Қорақалпоғистон Республикаси ҳукуматининг

бошлиғи Вазирлар Маҳкамаси таркибига ўз лавозими бўйича кириди.

Бугун Олий Мажлис тасдиғига Вазирлар Маҳкамасининг янги таркиби ўттиз тўрт лавозимдан иборат ҳолда таклиф қилинмоқда.

Учта лавозим, шу жумладан, Бош вазирнинг битта ўринбосари ва икки нафар давлат кўмитаси раиси лавозимлари қисқартирилмоқда.

Бош вазирнинг транспорт ва алоқа соҳалари бўйича муовини лавозими қисқартирилиб, унинг вазиғалари Бош вазирнинг энергетика соҳасини бошқарадиган ўринбосари зиммасига

юклатилмоқда. Давлат ўрмон кўмитаси билан Саноатда ва кончиликда ишларнинг бехатар олиб борилишини назорат қилиш давлат кўмитаси қисқартирилди.

Давлат ўрмон кўмитаси ўрнига Қишлоқ ва сув хўжалиги вазирлиги қошида Бош бошқарма ҳамда Саноатда ва кончиликда ишларнинг бехатар олиб борилишини назорат қилиш давлат кўмитаси ўрнига махсус агентлик ташкил қилиниши кўзда тутилмоқда.

Эътибор берган бўлсангиз, Бош вазирнинг янги таркибда қолаётган тўққиз ўринбосаридан тўрт нафаригина бевосита мана

шу ишни, яъни Бош вазир муовини вазиғасини бажаради. Қолган бештасига эса улар бошқарадиган соҳаларнинг аҳамияти ва мавқеига қараб, уларнинг таъсирини кучайтириш мақсадида Бош вазир муовини лавозими қўшимча тарзда берилган.

Бугун сизнинг тасдиғингизга тавсия қилинаётган таркибда, шунингдек, Бош вазир ўринбосари - Макроиқтисодиёт ва статистика вазири вазиғасини бажарувчи шахсга Бош вазирнинг биринчи ўринбосари мақоми берилмоқда.

(Давоми 2-бетда)













